

2 Thesaloniseisis

1

**Paulunè Thesaloniseises hamè Jesus pihipotima
pè ha nohimaỳ wi thèã thay palỳo.**

¹ Kami Paulu ya. Thesaloniseisis hamè Jesus pihipotima wamakỳ ha hwei ya thè oni ximaỳ. Silas xè, Ximoxiu xè, wahale pailiaỳ yalo kaho wamakỳ ha nohimaỳ wi thèã ximaỳ paxio. Kami yamakỳ Hwae Yai Pata wama e kỳ ka ki ha hwei ya thè oni ximaỳ. Pata thè Jesus Cristo wama e kỳ paxio wi wamakỳ ha ya thè oni ximaỳ. ² Hwae Yai Pata thè ka ki xè, Pata thè Jesus Cristo a xè wamakỳ pailiplaỳ mǎhiopè, wamakỳ pihi yanèkèmaỳ paxiopè.

**Yai Pata thè ha Paulu wã hwayè tèhè
Jesus pihipotima pè pailiplayè xiwãli, ÿhý thèpè
ha Paulu a xi toplalu mãhi, pè nè õhotaayè maki
Yai Pata thè ha pè pihi mokokoo he yati yalo.**

³ Kaho hepalayè wamaký totuhu, kuè yalo
Yai Pata thè ha yamaký xi toplalu xiwãli. Yai Pata
thè ha wamaký pihi makoko mãhiimatayu.
Wamaký ka nohimayu xaalio wi wamaký totuhu
mãhiimatayu. Kuè yalo Yai Pata thè ha xi toplalu
yama thèã thayè tèhè thè totihi, thè xaalio. ⁴ Kuè yalo
Yai Pata thènè ai thèpè ka pou paxio wi thèpè
hamè yamakýã hwayè mãhi thale, kaho wamaký
totuhu himayè, hapènaha yamaký kuu:
- Thesaloniseises hamè Jesus pihipotima pè
wayamayè mãhi makihi Yai Pata thèã ha thèpè he
yai xioplu mãhi. Jesus pihipotima pè nè õhotaamayè

makihì thèpè pihì pièkoimi, Yai Pata a pihipu
xoaoti he, - kulenaha yamakỳ kuu.

⁵ Yai Pata wama thèã pihipu yalo wamakỳ nè
õhotaay. Wamakỳnè õhotaay maki wamakỳ pihì
makoko he yati. Kuè yalo hapènaha thèã peheti
kua hikia. Yai Pata thènè thèpè xaali taay tètè
xaali mãhi thèpè nè kōamay xīlo. Ýnaha thè kuè
yalo Kamanè wamakỳ lĩa xaali himay, Kama a
patamu wi hamè wamakỳ lĩa yai pỳlỳo. ⁶ Yai Pata
thènè thè thapopènaha Kamanè thè xīlo hỳpỳa
xaaliki, kuè yalo kaho wa nè ka õhotaamay wihi
Kamanè thèpè nè õhotaamay nomỹhỳki.

⁷ Hapènaha Kamanè thè pleè thay, aho wamakỳ nè
ka õhotaay wi, Kamanè thè maplamali, kami
yamakỳ ha thè nè õhotaay wi thè pleè maplamali.
Pata thè Jesus a ka ki tile halanè a wawèlayu tètè
kulenaha thè kuplallo. Jesus a wawèlayu tètè wakè

pleeo wi a kãe wawèlayu, kama ãxu e pè waithèli mãhi kãe huimaỳ.

⁸ Yai Pata a phipu mao wihi thèpè ha a ixuu huimaỳ, kami yamakỳ Pata Jesus totihi thèã huaỳ mao wihi thèpè ha a waithèlimoa mãhilayu.

⁹ Kama a nè yuo tèhè, pè nè yai òhotaay maploimi, pè nè òhotaay xi wãliki. Ýhỳ nè ka òhotaay wihi Pata thè hamè pè ahetemapoimi he. Pata thè Jesus a totihi mãhi taplaimi he, a kohipè mãhi taplaimi he. ¹⁰ Kulenaha thè kuplalio, Pata thè Jesus a wawèlayu tèhè plee thèpènè a totihi mãhi taape he, wãha totihi mãhi thape he. Jesus auplano e thèpè ka ki, Jesus e ha pè pihi wènahamolayu, Kama a totihi mãhi he tole yalo, thèpè xiã toplalu mãhiki. Kaho wamakỳ ha Jesus yama wãha wèay tèhè Jesus e ha wamakỳ pihi kukema yalo ýnaha kaho

wamakỳ lĩa kuaỳ paxio, Jesus wama wãha totihi mãhi thay.

¹¹ Ýnaha thè kua yalo Yai Pata thè ha kaho wamakỳ pailiplaỳ xiwãli. Kamanè wamakỳ nakalema, kuè yalo xaali wamakỳ kuaapè wamakỳ pailiplaỳ, Kamanè wamakỳ kĩamaỳ pihio wi thè ha wamakỳ totohopè wamakỳ plee pailiplaỳ. Kama a kohipè, kuè yalo Kamanè wamakỳ ha pailiplalènè totihi wama thè lĩa ka thay wi thè kuplopè. Kama e ha wamakỳ pihi makokootipè, wamakỳ yai totohopè, Yai Pata thè ha wamakỳ pailiplaỳ.

¹² Yai Pata thè ha kulenaha yamakỳ kuu, hapènaha thè kuplopè. Pata thè Jesus wãha totihi mãhi thape he, wamakỳ totuhu taay he tèhè, kaho wãha totihi himaỳ paxiope he, kulenaha yamakỳ kuu. A nè mĩ mãhi maki Yai Pata thènè yamakỳ

nohimaỳ mǎhi, yamakỳ pailiplaỳ mǎhi Kamanè
yama thè thay ka pihipènaha yama thè thapè. Pata
thè Jesus Cristonè yamakỳ plee nohimaỳ mǎhi,
yamakỳ pailiplaỳ paxio Kama yama wã nosiã xaali
thapè.

2

**Jesus a wawè mao xoao tèhè ai hõximi mǎhi
thatima a yai thè lĩa wawèa palỳlayu.**

¹⁻² Pata thè Jesus Cristonè kama e pè napè lĩa
huu wi, pè lĩa kōaỳ wi, Jesus e ha yamakỳ lĩa walo
wi thèã ka ki yama thèã thay nomỳhỳo, ỳhỳ thè
kuplonimi xoa yalo. Hapènaha e thèpè ãha hõle ka
ku wi thèã ha wamakỳ mỳlaa si ihehe nomai, kami
yama e kỳ ãha hwama, oni yama e kỳ ãha

xèmèlema, - Pata thè lĩa yapày wi e thèãha kua
 hikiplalioma, - thèpè ãha hõle ku tiko. Kuè yalo
 hepalayè wamak̀y xuhulumo nomai, wamak̀y pihi
 hèt̀y mu nomai, wamak̀y kili nomai.

³ – Jesus a yapày hikilayoma, - thèpè kuu
 maki wamak̀y yai m̀y laa nomai. Hapènahã thè kua
 pal̀yplalio, hõximi thèã ha thèpè he lĩa yai xioplu
 mãhi pal̀yo, Yai Pata thè ha thèpè he lĩa ou mãhi
 pal̀yo. Hõximi mãhi thatima a yai, yanomae a ka ki
 a lĩa wawèa pal̀y layu. Ỹh̀y a ka ki a lĩa nè yai
 õhotaaỳ xiwãliki, xopali wakè hamè. ⁴ Ỹh̀ynè Yai
 Pata thè nẽhè lĩa yai wãlipu mãhi. Yai Pata
 kulenaha a kuplu pihio yalo kama a pihipomu
 kuki. Kutalenaha thèpè ka pihipu ka akelu wi
 thèpè ha a patamu he tole himu. Kuè yalo Yai Pata
 e yano hamè a lĩa t̀y k̀yo, a pihipope he. Ỹh̀y a ka
 kinè Yai Pata wã hilu kuki.

⁵ Kaho wamakỳ ha ya xoao tèhè ònaha ya kata kupi? Wamakỳ pihì mohotia tikoplalio kule?

⁶ Yanomae, hõximi mãhi thatima a yai, a wawèimi xoa. Yai Pata thènè tè he wemakepè ha tè he wèaimi xoa yalo thè wawèimi xoa, a wasu xoa. Kuè yalo kaho wamakỳ ha thè waoto, a wasu xoa yalo a wawèimi xoa.

⁷ Plee thèpè ha thè waotoimi maki yutu hõximi mãhi thè kua plauku hikia. Hõximi thè kuaaỳ maki hõximi thatima a wasu wi a lèa xoa. A wasu wi thè plahamali tèhè, hõximi thatima a wawèlayu. ⁸ Hõximi mãhi thatima a wawèlayu tèhè ãhỳ tèhè Pata thè Jesus a waithèlimu yapalayu. Kama wĩxianè a wãlia nè õhotaali, Kama a wakalaxi mãhinè ãhỳ hõximi thatima a nè pihia mãhiali.

⁹ Satanasnè e thè thamaỳ pihio wi ãhỳ
hõximi mãhi thatimanè thè thaplali. Kama a hõle
kohipènè thèpè thaplali, yanomae thèpènè thèpè
thaỹ taỹ ka ma hi thèpè hõle thaỹ, pihi
wènahamomaỳ wi thèpè hõle thaplali. – Huu, Yai
Pata thènè ãhỳ thèpè thaplamaema – thèpè pihi
hõle ku maki Satanasnè ãhỳ thèpè yai thaplamaỳ.

¹⁰ Hõximi thatimanè kutalenaha hõximi mãhi thèpè
kãe thaỹ mãhiki, thèpè mỳlamapè, Jesus peheti
thèã pikiape he. Kuè yalo xopali wakè hamè thèpè
lãa nè õhotaaỹ xiwãliki. Peheti thèã pihipu
kuhenaha hukèano thèpè kuplallo maki Jesus thèã
pikiaỳ yalo he pè nè õhotaki.

¹¹ Peheti thèã pèximaimi yalo he Yai Pata
thènè thèpè pihi mohotimaỳ, hõle thèã ha thèpè
mỳlapè, hõle thèã nẽhè yaipope he.

¹² Ỹhỳ thèpè ka kutalenaha thèpè lĩa pikiapè Yai Pata thènè thèpè pihi mohotimay. Jesus peheti thèã ha thèpè pihi kuonimi yalo Yai Pata thènè thèpè lĩa pikiay, hõximi thè ha thèpè xi xĩlo toplalu mãhioma yalo thèpè lĩa pikiay.

Paulunè Jesus pihipotima pè noa thay kõo, Jesus thèã ha thèpè pihi makokootipè.

¹³ Hepalayè Pata thènè wamakỳ nohimay mãhi. Yai Pata thè ha xi toplalu yama thèã thati. Hapènaha thè kuè yalo. Hapa mãhio tèhè hwei ulihi a thay mao xoao tèhè Yai Pata thènè wamakỳ yailema. Kama a nè Utupènè wamakỳ pihi ãuxi auplalema wamakỳ hukèapè. Peheti thèã ha yamakỳ pihi ha kaloplalènè wamakỳ hukèlema. Kuè yalo Yai Pata yama a xi ãhete mãhi himatipè.

¹⁴ Kami yamakÿnè wamakÿ yèmèkamalema, Jesus totihi mãhi yama thèã ka wèay wi wama thèã tèlema. Ỹhÿ thèãnè Yai Pata thènè wamakÿ nakalema, Pata thè Jesus Cristo a totihi mãhi himaÿ ka kuweinaha, Kamanè wamakÿ totihi himaÿ paxiopè.

¹⁵ Ỹnaha thè kua yalo, hwei thèãnè hepalayè wamakÿ uplaa kohipèki. Kahikÿnè yama thèã ka weyoni thèã ha wa pihi kaihia mãhiki. Oni pè hamè yama thèã kãe ka hÿpÿkeni, ỹhÿ thèã ha wamakÿ pihi kaihia paxiki.

¹⁶ Pata thè Jesus Cristo a xè, yamakÿ Hwae Yai Pata thè xè, yamakÿ nohimapu mãhioma. A nè mĩi mãhi maki yamakÿ pailiwapÿma, pihi kohipè yamakÿ kuotipè. Hapènaha Yai Pata thènè thèã plee wèama, Kama e ulihi hamè yamakÿ lĩa pÿlyo xiwãliti, kuè yalo ỹhÿ yama thèã nè tapoti, thè yai

kuplaliyo yalo. ¹⁷ Ỹhỳ Yai Pata thènè wamakỳ pihi
xi toplalamapè, wamakỳ pihi kohipèmapè.

Kutalenaha wamakỳã hway wi xè, wama thè thay
wi xè, Kamanè wamakỳ pailiplapè, xaali totihi
wama thè xĩlo thatipè. Yai Pata thènè kulenaha
wamakỳ pailiplapè yamakỳ kuu.

3

**Thesaloniseises Iklexa thèpènè Yai Pata thè ha
pèã hway tèhè Paulu xè, kama e pè xè pè plee
pailiplapè.**

¹ Hwei tèhè ai thèa. Hepalayè wamakỳ,
hapènaha wama thè thay. Yai Pata thè ha
wamalekỳ pailiplali, Pata thè Jesus yama thèã
weyu tèhè lope yama thèã plaukumapè, thèã totihi

mãhi himape he. Kaho wamakÿnè Jesus wama thèã totihi mãhi himaÿ ka kuinaha ai thèpènè thèã totihi mãhi himaÿ paxiope he. ² Hapènaha Yai Pata thè ha wamakÿ pleee ku, - Paulu xè, kama e ha thèpè ka pailio wi thèpè xè wama thèpè pailiplali, ÿhÿ thèpè nêhè ka wãlipu wi thèpènè, hõximi mãhi thèpè ka ki pènè pè waiyamaÿ maope he, - wamakÿ pleee ku. Pleee thèpènè Pata thè Jesus a pihipoimi yalo he, Kama e thèã peheti himaimi yalo he.

³ ÿhÿ maki Pata thè Jesus a pihi yèaimi mãhi, a pihi xïlo makokooti! Kuè yalo Kamanè wamakÿ pihi kohipèmali, wamakÿ pailiplali, Satanas hõximi thaatima a ka ki nè wamakÿ yapèkaÿ maopè, wamakÿ pihi yèamaÿ maopè.

⁴ Pata thè Jesus wamakÿ kohipè pihipu yalo hapènaha yamakÿ pihi ku. Kamanè wamakÿ pailiplaÿ, ÿnaha yamakÿ pihi ku. Kamanè wamakÿ

pailiplaÿ yalo kami yamakÿnè wamakÿ noa thapinaha wama thè xaali thay hikia, ÿhÿ wama thè plee thay xoaoti, ÿnaha yamakÿ pihi yai ku. ⁵ Pata thè Jesusnè wamakÿ pihi thamali hwei thèã ha wamakÿ pihi xaaliplopè, - Yai Pata thènè wale nohimay mãhi! – thèã yai lukèmapè. Hapènahà thè plee. Jesus a nè õhotaay tèhè a pihi makoko he xioploti ka kuinaha wamakÿ pihi plee makoko he xioplu paxiopè, wamakÿ nè õhotaay tèhè.

**Hapènahà Paulunè thèpè noa thay nomÿhÿo, -
Jesus pihipotima wamakÿ ka ki wamakÿ
yãxinomai, wamakÿ yai kãati, wamakÿ
ohotemoti, - Paulunè thèã thama.**

⁶ Hepalayè wamakÿ Pata thè Jesus Cristo wãhanè hapènahà wamakÿ noa kohipè thay. Jesus pihipotima pè ka yãxio wi pè ha, ÿhÿ kutalenaha

thèpè ha wamakỳ hwexionomai, wamakỳ nokao nomai. Kami yamakỳnè wamakỳ noa thapinaha thè thay mao wihi wama thèpè uwèmanomai.

⁷ Hapènaha wama thè tay hikio, - Paulu xè, kama e ha thèpè ka pailio wi thèpè xè yama thèpè uwèmay tèhè thè xaali, - wama thè tay hiki. Hapènaha yama thè thama, kami yamakỳnè xaali yamakỳ kīama, yamakỳ yai yāximoni. ⁸ Wamotima thèpè ha yamakỳ pihio puonimi. Wakala ha maki, tii tèhè maki xaali yamakỳ ha kīanè wamotima yama thèpè xīlo lulama, wamakỳ hōlimu nè ōhotaay maopè.

⁹ Ximano yama kutanè kaho wamakỳ wamotima pè ha yamakỳ pihio puo kunaha thè tolokoimi. Tolokoimi maki kulenaha yama thè thay pihionimi. Hapènaha thè kuè yalo. Kaho wamakỳ wamotima pè ha yamakỳ pihio puo kunaha ai thèpènè yamakỳ

uwèmay tikoki. Kuè yalo yamakỳ xaali kĩaỳ
paxioma ai thèpènè ÿhỳ thè uwèmay paxiopè.

¹⁰ Hapènaha thè plee kuè yalo plee wamakỳ
kĩaỳ tèhè thè yai xaali. Kaho wamakỳ ha yamakỳ
ta kuopi hapènaha wamakỳ noa thama, - A kĩaỳ
mao wi a iyaỳ maopè, - yamakỳ ta kupi.

¹¹ Kaho wamakỳ ha yãximu wi thèpè ã kua
yalo kulenaha wamakỳ noa thay. ÿhỳ thèpè xaali
kuaimi, hapènaha e thèpèã kuaỳ, thèpè kĩaỳ ha
maonè ai thèpè xĩlo yapèkay puoti. ¹² ÿhỳ thèpè
kuaỳ wi thèpè ka ki ha hapènaha kami yamakỳ
Pata thè Jesus Cristo wãhanè wamakỳ noa kohipè
thay.

– Wamakỳ pihi yanèkèki, xaali wamakỳ kĩaỳ
xoaki. Wa ha kĩànè aho wamotima thèpè kuplallo,
ÿhỳ wa thèpè way xaalio, – ÿnaha wamakỳ kohipè
noa thay. ¹³ Kulenaha yãxio wi ya pè noa thay

maki hepalayè ai wamakỳnè xaali totihi thè ha wamakỳ he xioploti, maplonomai.

¹⁴ Ai thènè hwei yama thèã oni kupènaha thèã nosiã huay mao tèhè, plee wamakỳ ha ÿhỳ wama wãha ha thanè, ÿhỳ wama noa ha waxukènè, ÿhỳ e ha wa hwexio nomai, kama a xuhulumu mãhiopè.

¹⁵ ÿhỳ maki, ÿhỳ wama a nêhè wãliponomai. Hepalahe a kutanè wa a xĩlo wasuli, wa a xĩlo pailiplali, kama a pihi xaaliplopè.

Thèã oni hulaplopè Paulunè hwei thè oni thakema.

¹⁶ Pata thè Jesus, pihi yanèkèmatima a yainè wamakỳ pihi yanèkamali, wamakỳ pihi yanèkè kuo xiwãlitipè, wamakỳ pihi yanèkè maplu he yatio maopè. Kaho wamakỳ ha Pata thè kuotipè.

¹⁷ Hulaplopè, kami Paulu yanè hwei ya thè oni thaplalema. Kami yanè ya thè oni ka ximaỳ wi kulenaha kami ya uno waoto kuaỳ thale, ya kanasi waoto mǎlè pei.

¹⁸ Kami yamakỳ Pata thè Jesus Cristonè plee wamakỳ pailiplaỳ mǎhiopè. Thèã kutaoma.